

Xuan Xosé Sánchez Vicente, *Les producciones clasicistas d'Antón de Mariñeguera*. Uviéu (Trabe, Batura, núm. 2), 2005, 336 páxs.

Echase de falta dacuando na investigación asturianista la esistencia d'un debate críticu al rodiu de delles cuestiones centrales nel mundu de la llingua y la literatura asturiana. La esistencia d'un campu de trabayu bramente ampliu y en zona mudiada inéditu y, otra manera, les dificultaes pal desenvolvimientu sostentu l'una investigación de fondura malapenes dexa al interesáu nestes cuestiones una ebatina de títulos, valiosos *per se*, pero que poques veces ye quien a dir más allá l'un puru inventariu de temes d'interés y xenerar un discutiniu intelectual real y eficaz sobre los mesmos.

El ciertru grau d'institucionalización llográu pa la filoloxía asturiana nos últimos años (con un efectu benéfico visible nel númerou y la calidá de les producciones científiques xeneraes) nun supunxo na práctica la igual d'esta carencia: la misión investigadora asumida por personas ya instituciones na *silva incognita* del asturianu foi demasiaes veces malinterpretada como micción acutadora, árbol per árbol, d'espacios vitales particulares, estrechos ya inviolables, nel qu'un poder sintise cómodamente como máxima autoridá nes cuestiones más pelegrines, y non tanto pol enfotu de construir lo que pudiera llamase un discursu estratéxicu sobre la nuesa cultura.

Qu'esa inercia paralizante fienda precisamente a cuenta del interés suscitáu nos últimos años pola figura del primeru de los nuevos escritores (y pol aniciu histórico de la nuesa lliteratura, con toles sos implicaciones na historia mesma de la llingua asturiana) tien daqué de prestosa parábola alleccionadora que, otra manera, empieza per da-y la razón al propósitu central que confiesa l'autor del llibru agora reseñáu. Efectivamente, sobre esi escritor malapenes conocíu va solo trenta años, o reducíu a una exemplificación singularmente temprana del pintoresquismu y la patayez inherente a cualquier tentativa lliteraria n'asturianu. L'interesáu dispón güei d'una retafila de trabayos que, dende diverses perspectives, permiten afondar nuna personalidá lliteraria y nun momentu histórico y cultural enforma más ricu y complexu de lo que tradicionalmente se pretendía. Bona parte d'ellos recueyense na bibliografía manexada nesta última contribución de Sánchez Vicente; otros, poles razones que quier, nun llegaron a entrar ende, anque sigan valiendo pa enriquecer esti debate: les collaboraciones conteníes nos volumes colectivos publicaos a cuenta del homenaxe a Mariñeguera na *Selmana*

de les *Lletres Asturianes* del 2000¹, les aportaciones de Miguel Ramos Corrada nel manual académicu d'historia lliteraria², cuando a otres reflexones puntuales como les conteníes na reseña d'Álvaro Ruiz de la Peña a la mio edición³ de les obres del autor⁴ ya incluso, con una perspectiva más orixinal (dende la Filoloxía Clásica), el recién trabayu de Ramiro González Delgado⁵.

Nun ye casualidá que sía agora Xuan Xosé Sánchez Vicente'l de firmar la última contribución relevante a esti discutiniu: l'ablucente capacidá de trabayu d'esti autor (dende fora, por cierto, de les canales académiques más convencionales) y el so conocimientu (ampliu y libre de prexuicios y complexos) sobre la historia lliteraria asturiana, obliganos a recordar, otra manera, que foi precisamente un trabayu de só'l de cambiar radicalmente l'enfoque sobre la obra de Marirreguera y la so significación, nuna ya antigua reedición de l'antoloxía *cavendiana*⁶ na que finiquitaba aquella visión diglósica y falsamente amable sobre la obra regueriana, que poco antes retomara tovía Díaz Castañón.

Sánchez Vicente plantea en prólogu tres propósitos: de mano, la comparanza de los testos fabulísticos reguerianos coles fontes llatines orixinales y otres obres contemporanies de la mesma materia clasicista. Darréu, a les resultaes d'esti análisis, «pásase revista al significáu social de los testos y de les sos propuestes sapienciales, tratando d'allugar el so real valir y significáu lliterariu» col envís de «demostrar la esistencia d'un autor con una conciencia y estilu propios [...] lloñe de la simplicidá y la elementalidá (o del funcionalismu ideolóxicu) que se-y vienen atribuyendo

¹ Antón de Marirreguera y el Barrocu Asturianu. Uviéu (Principau d'Asturies), 2000, y *Actes del ciclu de conferencies La Lliteratura Asturiana nel IV Centenariu d'Antón de Marirreguera*. Uviéu (Trabe), 2002 (dambos oxetu de reseña al cargu d'Álvaro Ruiz de la Peña en *Revista de Filoloxía Asturiana*, 2 [2002], páxs. 255-259).

² MIGUEL RAMOS CORRADA. «El Barroco y la lliteratura asturiana». *Historia de la Lliteratura Asturiana*. Uviéu (Academia de la Llingua Asturiana), 2002, páxs. 61-82.

³ ANTÓN DE MARIRREGUERA. *Fábulas, teatru y romances*. Uviéu (Alvízoras, Clásicos Asturianos, 3), 1997.

⁴ En *Revista de Filoloxía Asturiana* 1 (2001), páxs. 228-232.

⁵ RAMIRO GONZÁLEZ DELGADO. «El mito de Hero y Leandro en las letras asturianas». *HUMANISMO Y PEREVIVENCIA DEL MUNDO CLÁSICO. Homenaje al profesor Antonio Fontán*, III/4 (2002), páxs. 1843-1854.

⁶ Rebautizada como *Evilla de poesías en llingua asturiana*. Oviedo (Biblioteca Popular Asturiana), 1979.

tradicionalmente». De cullá de los sos postulaos sobre l'autor de referencia, Sánchez Vicente respe por volver les sos reflexones nun «intentu de redefinir el significáu social global de la nuestra lliteratura per mediu l'escrutiniu de los discursos críticos sobre la mesma y la valoración ideolóxica última, en cuantes manifestación oxeriva d'una cultura nacional —la nuestra—, que d'ella se fai».

El plantegamieniu metodolóxicu inicial nun fai falta calificalu como correctu y necesariu; ambiciosu y, amás d'ello, sorprendentemente innovador nel ámbitu de los estudios lliterarios asturianos. Anque se supón que debiera ser l'abecé de los estudios lliterarios, sigue siendo una zuna incomprendible ente nosotros la desatención del análisis testual y estilístico de les obres, probablemente por cuenta de la consideración, entá mui afitada, de la lliteratura n'asturianu como daqué puramente testimonial dende'l puntu de vista de la historia social o llingüística. Esta circunstancia val por ella mesma pa reforzar el puntu de partida último del autor: la necesidá de da-y al estudiu de la nuesa lliteratura un puntu de vista *lliterariu*, de cullá d'otru tipu d'aspectos, por dicir, circunstanciales, por relevantes que sían.

Sánchez Vicente entámala entós con un estudiu curiosu de les fábules reguerianas que, efectivamente, dan en descubrí-yos una entidá artística que, esplicable dende les coordenaes estétiques específiques del so momentu y del so entorno, naz esencialmente de la creatividá d'una pluma que sabe depués integrales nuna propuesta orixinal y creativa propia. El críticu más escépticu podrá topar nel trabayu de Sánchez Vicente un sólidu argumentariu nesti sen sofistáu na mesma materialidá de los testos. Con ello, l'autor derrompe una llinia d'investigación que, bien aplicada, entiendo que dexaría afinar más l'auténtica dimensión creadora del de Carreño (de Llorgozana o Priñedes, pero difícilmente *candasín*, como reitera nel trabayu), la cuestión de la intertestualidá y la de la so efectiva formación como escritor.

Efectivamente, esti trabayu nun escosa les virtualidaes d'un estudiu como'l so autor propón, sobremanera no que fai a la parte comparativa. Paez correcta, como cuestión de métodu, la comparanza de les fábules reguerianas coles fontes clásiques de referencia pa la materia mitolóxica aínde tratada, y de la mesma, resulten significatives les conclusiones entesacaes d'esí oldéu. De toes formes, cuento que nun ve la misma la pertinencia de les comparances de *Píramo y Tisbe* y *Dido y Eneas* coles correspondientes obres d'Ovidio y Virxilio, que la remisión de *Hero y Leandro* a Museo. Si los primeros yeran autores bien conocíos pa cualesquier estudiante de llatinitá de la dómina (y de la so llectura entiéndese que Maríreguera tenía un dominiu baltiable de la materia), más duldes plantega'l casu de Museo. Anque nun

voi ser terminante nesta cuestión (porque faló más dende la intuición que desde la convicción), ye probable que la consideranza tamién d'una fonte ovidiana (*nes Heroides*) igual que la d'otros clásicos latinos pal tratamiento del mitu nun fora gora impertinente pa un enfoque como'l que quier Sánchez Vicente.

En tou casu, más recortiu pudiera tener la comparanza d'unos y otros *testos* reguerianos con pieces hispániques coetanies, ensin ello cuestionar cosa la orixinalidá de Reguera. Nada impertinentes abulen los análisis comparativos de les fábules reguerianas coles correlatives de Boscán o Castillejo, pero sí insuficientes (cuantimás nel casu de *Dido y Eneas*) cuando'l tratamiento d'estos temes ye abondoso en tola lliteratura contemporania, que Sánchez Vicente demuestra conocer con fondura. Encetar el tratamiento d'estes materies n'autores consideraos menores podía, ensin duldes, ofrecer datos interesantes. Ensín apurar agora esta cuestión, ye de recordar como Ramiro González, nel trabayu enantes citáu, albi-draba correspondencies ente'l *Hero y Lleandro* reguerianu y la versión poética de Francisco Manuel de Melo.

Comentariu aparte merecen les reflexones sobre *Píramo y Tisbe* y, en concreto, sobre l'autoría d'esta pieza que yo, na mio edición, cuestionara. Sánchez Vicente retoma nel so llibrus esti asuntu y defende la opción de Marireguera como'l verdaderu autor. La so llinia d'argumentación, congruente y midiada, puede llese aínde (páxs. 116-131) y yo, pela mio parte, nun atopo agora sofitos nuevos que los que Sánchez resume con rigor y xusteza nes sos páxines: l'interesáu podrá formase'l so propiu criteriu, que ye, a última hora, de lo que se trata. Sicasi, de cullá de determinar l'autoría concreta d'esta pieza, d'esti discutiniu remanez toa una llinia discursiva de fondu algame que compromete lo que ye la praxis metodoloxica de seguir nel estudiu de la nuesa lliteratura, tocantes al riesgu de contaminación ideolóxica que tan frecuentemente la amenaza.

La idea central de Sánchez Vicente consiste en considerar que les diverxencias formales que presenta'l *Píramo y Tisbe* conocíu con oures fábules reguerianes responden, non a una autoría diferente, sinón a una reflexón del autor sobre la so propia obra y a una voluntá espresa de non *calcar* los moldes de les otres dos fábules: esto ye, d'una clara concencia d'autor, d'iniciativa creadora, de voluntá d'orixinalidá, d'autorrenovación y, en definitiva, de madurez lliteraria. Como tal argumentu, ye bonamente defendible, una y bones esos rasgos d'autor son reconocibles en Reguera. Permitome, de toes formes, introducir una precisión a la que yá fixí referencia na mio edición y a la que puede dáse-y el valor que quier: la cita al tema de *Píramo y Tisbe* en *Hero y Lleandro* podía faer pensar qu'aquella

(como otros fábulas clásiques áinde citaes, quiciabes pieces inédites) yera cronolóxicamente anterior a ésta, polo que, en tou casu, sedría la conformanza estructural de *Hero y Lleandro* la de mostrar un procesu autocríticu de reflexón y maduración de Marirreguera como autor.

Ello ye que, a Sánchez Vicente, el supuestu cuestionamientu de Marirreguera en cuantes qu'autor incapaz reflexonar críticamente ya innovar sobre la so propia obra (cosa que, en concencia, nunca pretendí al nega-y l'autoría del *Píramo y Tisbe* conocíu, y fui yo l'único que lo fexo) llévalu a sospechar que, incluso l'enfoque asturianista sobre la lliteratura n'asturianu, acepta o asume «los tópicos del 'enemigu' sobre la nuestra lliteratura y la nuestra cultura, como una lliteratura y una cultura condergaes per se a nun ser más qu'un entamu, un arbol nianu más o menos prestosu o pretenciosu, pero que nun pasa nin va pasar de ser curiosidá o adornu: enxamás árbol con mayúscules, lliteratura y cultura como les otres» (páx. 130).

De primeres, podía paecer comprensible esta prevención, pero tamién cuento qu'apilar al otru cabu tien riesgos. Escribir la historia (y tamién la historia lliteraria) ye en bona medida adobanar un discursu escoyendo una perspectiva y descartando otros a partir d'un criteriu, a última hora, intencional (remito al mesmu prólogu del llibru). Depués, puede haber más o menos ambición y precuru na recovida de datos, o más o menos coherencia y finura argumentativa na construcción del propiu discursu (y a Sánchez Vicente nun-y falta nin uno nin otro), pero nun procede tanto reclamar como principiu exclusivu, y frente a otros posibles visiones alternatives, un grau superior de neutralidá ideolóxica, porque cuéntase'l riesgu de producir l'efectu contrariu al deseáu: afitar como dogma epistémicu lo que nun ye otro qu'un inclín más ente otros posibles, que quedarien asina anulaos como posibles vías útiles d'averamiento a la realidá.

Aquí y agora, el problema nun ye que tengamos una visión ruina de la realidá histórica de la lliteratura asturiana porque nos pese más o menos ciertu apriorismu ideolóxicu: ye que la nuesa percepción puede acabar modulándose d'una determinada manera a razón de la calidá y el nivel de conocimientos que podamos tener sobre la lliteratura asturiana (entá llenu, ye verdá, de raleres). Poro, más que reclamar *neutralidades* discutibles, false esixible'l rigor nos procedimientos d'análisis (que ye, por cierto, ún de los méritos d'esti llibru) dende la humildá de saber que la ciencia nun ye más qu'una sucesión decreciente d'errores.

Volviendo a *Píramo y Tisbe*, el problema sedrá tan simple, o tan complexu, como determinar si ciertu personaxe ye autor o non d'una pieza con dellos problemas de tresmisión. Científicamente, caben munches hipótesis (¿a ver si la ver-

sión conocida nun va ser una reellaboración de Caveda o d'un contemporánu?). Elevar a partir d'ehí l'alerique a «¿quién queremos que sea Reguera na nuestra lliteratura?» [páx. 123] (si un autor inquietu o creativu o un puru atropador de tópicos) llévanos, queriendo tornanos de falsos complexos, al mesmu peligru de perversión doctrinaria denunciáu cuando la exa central de la crítica ye'l prexuiciu castellanista. Nun se trata de querer esto o lo otro, sinón de dar respuesta a problemes concretos a razón d'unos datos y un métodu. Y nun puede ser d'otra manera: que nos preste que Reguera tenga más o menos obra o queramos habilitar o non como autor de referencia pal xviii a Benito de la Uxa (al que, por cierto, reconoceríemos-y cierta capacidá de reflexón crítica sobre la tradición precedente, como nes lliteratures *normales*) ye daqué completamente irrelevante cuando de lo que se trata ye, simplemente, conocer una realidá histórica oxetiva. Y, si non ¿quién queremos que sia Pachu'l Péritu na nuesa lliteratura?, ¿prestábanos entendelu como un Kafka xixonés sobre'l que pesa un fuerte prexuiciu diglósicu y una ignorancia xabaz de la realidá cultural asturiana, que nos quita de ver la so innegable xenialidá? O, por meter el deu en güeyu ¿qué queremos que sia la fala del Navia-Eo na nuesa filoloxía?, ¿asturianu occidental?, ¿una xíriga local?, ¿el romance resultante de la evolución milenaria del llatín ente los egobarros romanizadores?, ¿egobarromance?, ¿castellán con localismos pintorescos? Entiendo que son a priorismos improcedentes dende'l puntu de vista científicu. Polo demás, con un mizcu d'inxeniu y muncha plepa, too ye argumentable.

Faigo esta crítica dende cierta empatía col autor, cola complicitá de creer saber a qué se refier y dende l'alta consideranza que, con esti mesmu llibru, acreedita merecer nos estudios lliterarios asturianos. Entiendo, otra manera, que lo qu'anda palpando per baxo d'esta llinia de discursu nun ye tanto la cuestión concreta de l'autoría de *Píramo y Tisbe* (puntu onde se manifiesta un tanto es temporaniamente) como na más xeneral y comprometida de la funcionalidá social de la lliteratura asturiana, que ye probablemente'l matu de la culiebra, por cuantes implica non solo la propia finalidá de los testos, sinón la so mesma constitución formal y, finalmente, el so públicu, esto ye, el so ámbitu social *natural*.

Sánchez Vicente fai por tornase de la llinia interpretativa dominante sobre la obra de Reguera, la qu'él diz del *funcionalismu ideolóxicu*, que supón qu'el so sentiu últimu obedez a una intención esencialmente didáctica y doctrinal. Según l'estudiosu, esa llinia anecia nuna visión de Reguera «como un lliteratu inocente (casi ensin técnica), casi malgré lui, qu'escribe con otra finalidá que la lliteraria (la parroquial y didáctica) y d'una lliteratura que nun ye artificiu, distan-

ciamenti d'oficiu, sinón *simplicitas d'espeyu*, tresllación directa de la realidá y de la voz del pueblu» (páx. 129). Aboga, pela contra, pola consideranza de los testos reguerianos en cata de la so *lliterariedá*, según él cuestionada poles tesis que defenden la preminencia d'un esencial envís didácticu. A afitar la so postura dedica un apasionáu capítulu (páxs. 237-252), que se fai en dos si se considera como'l so allongamientu natural el dedicáu darréu al tema del erotismu nel autor (páxs. 253-270).

Empecemos per considerar qu'el conceptu mesmu de *lliterariedá* (o simplemente, los de *lliteratura* o *arte*) nun respuende a un universal absolutu, sinón a un valor relativu a un marcu sociocultural variable a lo llargo del tiempu y del espaciu. El llector d'anguaño quier de la literatura un típu de satisfacción que yá nun ye concebíu a razón del mesmu códigu de valores que pudiera tar operativu n'otres dómines, como nun lo ye n'otros entornos socioculturales ayenos al nuesu mundu occidental. Verdá ye que les fábules reguerianes son quien a satisfacer en daqué medida esa esixencia d'un llector actual: Sánchez Vicente esplica'l porqué y el cómo col so análisis y, amás, tien razón al enfatizar el méritu del autor y la perduración de la eficacia estética de les fábules a lo llargo de los sieglos. Seguramente la causa d'ello (y volvemos tar d'alquierdu con él) ye que Marirreguera yera consciente de lo que faía, de los efectos que buscaba y cómo llogralos d'accordies cola so formación y coles sos dotes particulares de creador.

La cuestión ye cómo entender el méritu d'esti autor, si dende lo que nosotros esperamos d'él pa escribir los nuesos llibros d'historia o dende lo que d'él yera esperable nel so momentu históricu. Un autor nun sal de la nada: Marirreguera nun vien d'un limbu parnasianu derecho a satisfacer los apetitos estéticos d'historiadores modernos de la literatura asturiana, si fora casu; naz nun momentu cultural (el Barrocu) y nun espaciu social (Asturies) y, dientro d'estes coordenaes, revélase como escritor capaz de crear un mundu propiu y orixinal. Esi ye'l so valir: nun ye un simple executor del repertoriu de convenciones estétiques definitorios del so tiempu (que ciertamente conoz y remana con arte), nin un simple *bablista* que despliega rutinariamente los tópicos locales al usu. Ye una intelixencia viva qu'interpreta la so experiencia social *asturiana* coles ferramentes que la cultura *europea* de la so dómina-y apurre, y un creador reflexivu qu'enriquez los códigos intelectuales nos que se forma académicamente cola experiencia directa d'una vivencia concreta que-y apurre otres claves diferentes (*asturianes*) igualmente útiles. Dende un puntu de vista histórico ye, polo tanto, interpretable esclusivamente con relación a l'Asturies del sieglu XVII.

Con éstes, ¿cuál ye'l conceptu de *lliteratura* realmente vixente na Asturias del sieglu XVII?, ¿cuáles son les espectatives del público potencial de la lliteratura n'asturianu del sieglu XVII, que nun contaba con una tradición previa conocida? ¿Sabemos tanto d'ello que podemos permitinos esgazar de la *lliterariadá* realmente operativa nesti momentu y nesta llingua'l componente didáctico-moralizante? ¿O tamos enunciando un principiu xeneral d'acordies col qu'e'l sen didácticu entra en contradicción cola intencionalidá estética d'una obra?, ¿carez de valir estéticu tola tradición universal de lliteratura didáctica?, ¿carez de valir estéticu l'abondosa lliteratura barroca d'esti envís?, ¿ataya'l didactismu la capacidá creativa d'un autor o puede concebise, pela contra, como un puntu de partida descontáu nun determináu momentu lliterariu sobre'l qu'un autor puede introducir innovaciones? Na mio opinión, el méritu creador de Marirreguera sedría precisamente ési: non tanto quítase d'una corriente de didactismu lliterariu que sigue pae-ciéndome evidente na so lliteratura, sinón asumir el desafiu de xenerar una estética propia resalvando les inercies inherentes a esti tipu de xéneros, ensin por ello desnaturalizarlos.

A última hora, nun cuento tar mui llueñe del pensamientu de Sánchez Vicente, qu'almite la esistencia d'un *espíritu discursu moralizador*, pero non como propósitu principal, sinón como amiestu al puru oxetivu artísticu creador (páxs. 248-250). Na mio opinión, les dos coses pueden asitiase perfectamente al ras, y si l'oxetivu doctrinal bien puede tar nel aniciu de la creación (porque quiciabes foi perhí per onde pudo topar camín una incipiente escritura n'asturianu), el llogru reguerianu consituiría en que la percepción de la so obra tenga llugar primariamente en clave estética, con independencia de qu'unos (los contemporáneos) empobinaren con facilidá contra la llección moral y otros (los actuales) reviciemos nos valores artísticos ensin más.

Por eso, nun ye cosa d'enruinar la lliteratura asturiana frente a otros tradiciones. Simplemente, si podemos afitar alguna premisa mínima sobre la poética operativa n'asturianu nel XVI, ye qu'ésta malamente diba reproducir ensin más la virtualmente posible nos grandes focos lliterarios de la dómina; l'entornu sociocultural y sociollingüístico yera otru (*asturianu*) y otru l'espaciu social pel que podía derromper camín esa naciente lliteratura, como otru'l perfil humanu ya intelectual de los creadores y público naturales. Por eso falamos de *lliteratura asturiana* y non d'otra cosa rara (por casu, *lliteratura dialectal española*). Qu'esi entornu primixeniu nun fora la corte de los Médicis o la de los Austrias nin el so envís esencial una suerte d'esteticismu diletante o una trescendente metafísica

nun tien por qué nos acomplexar, por una razón fundamental: porque a Mari-reguera nun lu acomplexaba, y foi esi específico marcó sociocultural el qu'asumió, non pa simbiotizar pasivamente nel, sinón pa renovar conscientemente con una propuesta estética y sapiencial (bien estudiada por Sánchez Vicente) dotada amás d'una notable capacidá de perduración nel tiempu. El que neguemos, como principiu reguerianu, el del *arte pol arte*, nun implica que-y neguemos sentiu artísticu a les sos obres.

Sánchez Vicente contrapón a la posibilidá d'una funcionalidá didáctica pa les fábules una serie de problemes de tipu pragmáticu, que resume asina: «¿tien daqué sentiu qu'un clérigu que tenía a la so disposición el púlpitu, la visita a les cases, los sermones cuaresmales y la casa parroquial buscara un nuevu instrumentu alleccionador pa la so parroquialidá, al través de la recreación de fábules del mundu clásicu? Al nuestro paecer, la cuestión ye tan disparatada que nun requier respuesta» (páx. 247).

Na mio opinión, tendrá sentiu'l recursu a práctiques proselitistes alternatives na mesma midida na que la predicación convencional nel púlpitu (estereotipada y costreñida tanto por esixencies de ritual, tradición y dogma) resultara más o menos eficaz con relación al oxetivu buscáu y se sintiera más o menos necesidá de recurrir a otros ferramientos. ¿Tamos obligaos a considerar que la pura predicación eclesiástica en materia de sexu resulta tan eficaz, o resultólo históricamente, como p'acutar esta fundamental inquietú clerical nos sermones del domingo o roñando pelos feligreses casa per casa? Pero, más importante, ¿consideraba realmente la misma ilesia coetanía (l'asturiana) la conveniencia d'otros métodos d'adoctrinamiento? Permítome recordar el pasaxe de les constituciones sinodales uvieínes de 1553 qu'encamentaba a los párrocos que, nos *ayuntamientos* colos fieles, se quitaren de cantar *cantares deshonestos* (porque, al paecer, cantábenlos, lo que ye interesante de cara a Reguera), en cuenta de lleer dalguna *lizion de latín o romance* (páx. 118 de la mio edición). El disparate, polo tanto, nun ye míu, sinón del obispu sancionador naquel remoto 1553, y si yera extravagancia miániques nun yera la única.

A partir d'ehí, lo que podía pretender el clérigu escritor al cargu d'esta función yera, simplemente, eficacia; por exemplu, por aciu d'un planteamientu amable del conflictu moral en cuestión. O, por casu, al traviés d'un testu dotáu d'un ciertu attractivu estéticu (¿vamos tener que supone-y a la población asturiana del xvii una total falta de gustu?), que podía empezar pel recursu a matieries emblemátiques de la modernidá artística del momentu (¿o tenemos que suponer esi públicu asturianu *popular* tan impermeable a les corrientes europees daquella

como pa nun ser a reconocer siquier dellos motivos artísticos comunes, *anque* fora pa dexase fascinar por ellos, cuandoquier superficialmente?). Si repuna la posibilidá de ver al campesináu asturianu recreándose con histories del mundu clásicu, debiera ser abondo recordar cómo esti tipu de materia s'esparde al travies del romanceru o mesmo de la narrativa oral-tradicional hasta güei. En tou casu, si tan insólitu resulta'l recursu a unes fábules clásiques n'asturianu con esta finalidá moralizante, nun debiera caer embaxo qu'igual ye que tamos tropezando per chí cola primera de les xenialidaes del nuesu autor.

Sánchez Vicente sigue plantegando nesti puntu una reducción al absurdu siguiendo cola riestra d'interrogaciones: «¿Quién tresmitía estos testos a una población mayoritariamente analfabeta? ¿Sería él en tolos casos?, ¿crearía un cuerpu especial –anque necesariamente curtiu– de predicadores/llectores?, ¿dónde se lleven los testos a una población espardía peles caseríes? ¿Aprovecharía Reguera les esfoyaces, esbillés y filandones p'allugase ente la xente y leer los sos testos?, ¿o fairíase más bien los domingos como una forma especial de domenicar?» (pax. 247) Remito al testu anterior de 1553 y, más en xeneral, a la montonera de testimonios, y dalgún qu'otru estudiu, sobre la práctica xeneralizada de la llectura pública na España de la dómina, llectura pública que, otra manera, requier dos condiciones: que daquién sepa leer (quién sabía na Asturias de la época?) y que se constituyera nun determináu momentu y llugar un públicu oyente, que mayoritariamente nun sabría. ¡Hai dalguna poderosa razón pa refugar la idea de qu'esi tipu de práctica tuviera llugar n'Asturias, nun *ayuntamientu* como los qu'apunta Sánchez Vicente, cuando sabemos (ente otro, porque nos lo diz Mari-reguera) qu'ésos yeran los momentos afayadizos na sociedá tradicional pa daquíen contar cuentos o recitar copies y romances? L'Asturias tradicional, y hasta nun va tanto, nun desconoz esi tipu de práctiques de llectura comunal que tan improbables-y abulten (desconozo por qué) a Sánchez Vicente.

En tou casu, el mesmu repertoriu oral-tradicional acreedita por él mesmu'l trasvase de temes procedentes de la lliteratura escrita *culta* a la oralidá, de la mesma qu'ésta apurre los sos propios materiales *folclóricos* a los escritores al usu (val pensar n'*El Quijote*). Dalgún camín tendríen que seguir estes pieces, supongo qu'empezando per un exerciciu de llectura a un públicu illetráu, y non de manera puntual. Poro, nun creo que tenga nengún xaciu la rocea manifestada al respectu; yo, en concencia, nun veo nesti supuestu circuitu vital de les obres reguerianes nin inverosimilitú, nin niciu nengún de condenable promiscuidá o de degradación de les lletres patrias.

Sía como quier, ello plantea abiertamente la cuestión del público y la transmisión de la obra regueriana. Sigue Sánchez Vicente mirando de cuestionar un auditoriu de llabrador pa les fábulas reguerianas: «¿Y cómo ser pa entender que, puestos a ello, se busquen motivos tan llonxanos y distantes como los de les fábulas que, per otru, requieren un ciertu entendimientu y una cierta predisposición pa sentiles como próximes? ¿Y, por qué utilizar una estrofa culta, la octava, que requier mucha atención y capacidá de siguimientu, pa percibir los sos detalles nuna recepción oral? ¿Y cuál ye la razón pa dise a composiciones de 464, 344 y 248 versos, tan difíciles d'atender por completu y tan fáciles pa perdese y non, envede d'ello, otres más curtias y cencielles?» (páxs. 247-248).

Sánchez, como antes José Miguel Caso, imaxina-y a Marireguera un público fundamentalmente eruditu, que, según el primeru, namá puede acceder a les obres pentemedies de la llectura personal y posada. Esi público seguramente esistía (por casu, el xuráu que lu premia nos xuegos florales de 1639 o los sucesivos copistes que reproducen los testos) y d'él yera consciente Reguera cuando, efectivamente, chisca les sos fábulas, d'inspiración llibresca, de guños eruditos namá asequibles a personas con un ciertu nivel de formación académica. Esto nun ta en cuestión, pero nun anula la posibilidá d'otru tipu de público distintu que, quiciabes nun pudiendo calar tolos posibles matices de la obra regueriana (¿calaba'l conxuntu de llectores castellanos de la dómina tolos matices de forma y sentiu d'*El Quijote*?), podía perfectamente seguir el cursu de la fábula y la so llección moral.

Les respuestes a la última batería d'entrugues de Sánchez Vicente cuento teníes anticipaes en párrafos anteriores, pero volvamos al casu: una fábula clásica nun tenía por qué sentise necesariamente llonxana pa un público *popular* del sieglu XVII, nin esi público tenía por qué carecer d'*entendimientu* (¿por qué?) ente lo que nun yeren otro que conflictos humanos universales espuestos con bastante ilinialidá. Y si, a última hora, la materia mitolóxica grecorromana pudiera percibise en dellos estremos como distante (non más que la bíblica o'l particular cosmos del cuentu maraviosu tradicional), precisamente l'arte *endoculturizador* de Reguera consiguía faela próxima al volvela, por casu, nel «*cuento d'un galán y una galana*» (*Hero y Lleandro*) con perfiles humanos reconocibles. Sorprende l'argumentu de la estensión en versos d'estes pieces, cuando nun ye difícil topar pieces oral-tradicionales en forma más estenses y complexes estructuralmente, ensin qu'ello paeza torgar el so siguimientu y comprensión. En cuantes a les dificultaes intrínseqües de la octava, sedrán toles que se quieran, pero'l recitáu público po-

pular de pieces con esta forma métrica yera común na España de la época, d'acordies col testimoniu de Rojas Villandrado (1603) sobre compañes itinerantes de cómicos que «hacen un entremés, algún poco de un auto, dicen unas octavas, dos o tres loas, llevan una barba de zamarro, tocan el tamborino y cobran a ochavo», testimoniu que, por cierto, yá recoyí na mio edición (páx. 32) y que, nin niega l'aniciu y naturaleza *culta* de la octava, nin presupón un mayor *entendimientu* na canaya castellana en comparanza cola asturiana.

Sánchez recurre finalmente a un argumentu temáticu pa reforzar la so hipótesis: el tratamientu abierto de la sensualidá y la sexualidá en Reguera, al que y dedica un capítulo. L'argumentu céntrase en considerar qu'el xenerosu despliegue de sensualidá qu'apaez en delles obres de Reguera ye contradictoriu con una supuesta pretensión moralizante. Sánchez esprésase nestos términos: «que enseñanza moral-yos llegaría, en tou casu, a aquellos aldeanos, dafechamente illetraos, d'una riesta de suicidios y fornicios ente animales y mujeres o ente dioses y mujeres; riesta que se talantaría mal ensin despicaciones contestualizadores y que, en tou casu, yá despicada, nun podría sirvir más que d'escandalu? ¿Piénsase de verdá qu'eso constituye un instrumentu catequéticu y moralizador?» (páx. 267).

L'argumentu cuenta que tien interés, pero primero tien que se redimensionar, considerando que nin les fábules respuenden, nin tanto, a la descripción hiperbólica que fai d'elles nesti párrafu, nin el so potencial públicu llabrador o urbanu (ye igual) yera un coru d'arcánxeles dispuestu a escupuliciase a la mínima calentura mental. Otro ye si la dosis de carnalidá qu'alministra Reguera ye avenible o non con un ensotu estrictamente moralista; Sánchez piensa que non y refuga igualmente la idea de qu'estes escenes y comentarios puedan tar emplegándose como llambiscadures coles qu'atrayer al públicu hacia una grave conclusión moral, como defendiera Mariano Suárez y, en della midida, yo mesmu.

Como dixi, la oxeción tien interés. Na mio opinión, una presentación amable, picardiosa y desenfadada del conflictu moral nun tien por qué dicir mal col fondu doctrinariu que se defende pa estes obres. Sicasí, ye evidente que Reguera apártase nesti tema de lo que ye la pura ortodoxa tridentina en cuestiones de sensualidá erótica. Con éstes, l'inquiz pudiera tar en definir con más precisión sobre qué cosa pretende realmente moralizar Reguera (d'asumise, lóxicamente, esta interpretación). ¿De qué falamos cuando falamos de sexu? En realidá, creo tener dicha la mio opinión (igual non debidamente matizada) y creo reconocer della conformidá na referencia que fai a ella Sánchez Vicente (páx. 249, nota 307).

Marireguera nun ye tanto'l voceru de la ortodoxa tridentina nel so escupuliciu monxarratu contra la sensualidá carnal (la octava dedicada a la descripción d'Hero merecía un llugar d'honor nuna antoloxía erótica), como validor convenciu d'una serie de pautes de rellación social garantes de la estabilidá d'una comunidá, dende'l llamáu a la responsabilidá del individuu na so conducta personal. Esto puede tener una clave asturiana (y, si se quier, *parroquial*) pero, en tou casu, conecta con un estáu d'opinión xeneral dende la Edá Media qu'esculpa la práctica sexual como una necesidá fisiolóxica (y sobre la que cabe una visión amable) y condena la pasión amorosa como una enfermedá que destrui al individuu y la sociedá, frayando convenciones y equilibrios. Esto diz bien col tonu de les fábules reguerianes, respondería a una pauta socialmente asumida y, anque llueñe de tou escupuliciu tridentín, podía ser bonamente avenible coles pretensiones más realistes de la ilesia asturiana d'entós nel so enfotu de llindiar conductes.

Nun creo, matices aparte, que'l públicu y la difusión de les obres de Marireguera tengan necesidá de ser distintes de les apuntaes, nin cuento que lo espuesto comprometa un didactismu esencial nes fábules. En tou casu, el de Priendedes revelase como un autor versátil que, poles sos mesmes cualidaes, ye quien a llegar a distintos tipos de públicu, d'aínde seguramente la so sonadía y el por qué del constituyise en referencia fundacional de la nuesa lliteratura, cuando otros coetáneos cayeron dafechu nel anonimatu o nel olvidu. Y nun se muestra nello como nada distinto d'otros autores notables del momentu, resalvaes les específiques circunstancies de caún. Polo mesmo, la satisfacción d'un públicu cruditu y la so vanidá d'autor (y d'autor n'asturianu), tolera'l supuestu d'una voluntá espícita de conectar col mundu y los valores más populares, mui probablemente canalizada, reitérome nello, per una vía abierta de lliteratura doctrinal estimulada pola mesma ilesia (como n'otres lliteratures nacientes) y bien fecha a ciertes corrientes constitutivas del Barrocu lliterariu y hasta consideraciones ideolóxiques como les qu'analicé n'otros trabayos. Esi didactismu nun cuestiona, nin tanto, la potencialidá de los testos como fonte de placer estéticu; simplemente, desín un marcu de referencia inicial con rellación al cual retáyase y resal el xeniu y la inventiva del nuesu autor, que paez que yá supo entender y valorar acionadamente'l so públicu contemporaniu. Un lector actual, doi'l mio testimoniu, puede tamién algamar esi placer y, ensin dudla, una lectura posada del trabayu de Xuan Xosé Sánchez Vicente ye una más que valiosa ayuda nesa xera.

XULIO VIEJO FERNÁNDEZ